

بِسْمِ اللَّهِ الرَّحْمَنِ الرَّحِيمِ

إِنَّ الدِّينَ عِنْدَ اللَّهِ الْإِسْلَامُ



إِلَهُ الْأَنْبِيَاءِ مُحَمَّدٌ رَّسُولُ اللَّهِ

## KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

11 Octobre 2019

12 Safar 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

### AL-HUJURAT : GHIBBAT (PARTIE 5)

*Alhamdulillah*, mo pé continuer mo Khutba Jummah lor « *Ghibbat* » et bane sujets ki attacher avec « *Ghibbat* », surtout concernant *Mohabbat* (l'amour) pour Allah, pour le Saint Prophète (saws) et pour le travail de *Deen-e-Islam*, et sa faire le 5<sup>ème</sup> vendredi, kot mo pé alle bien en détail pour faire zot bien compran lor sa sujet là.

Couma mo ti dire vendredi dernier ki Hazrat Muhammad (saws) ti ena connexion direct avec Allah et sa l'amour là ti pé déssane directement de Allah (swt) même. Li pas ti bizin faire amène ene la lutte (*Jihad*) pour sa. Mais pou bane dimounes ordinaires, li vine nécessaire ki zot amène la lutte pou ki zot atteindre sa l'amour là parski li pas ene zaffaire si simple pou gagne l'amour Allah directement, et pour gagne aussi l'amour du prophète (saws). Et li pas si simple ki en référence avec sa l'amour là, ou établi bane relations d'amour avec bane dimounes en générale.

Bizin lutter pour atteindre sa. Pour sa, ou bizin garde en vue ou *Mohabbat* et aussi ou bane manquements ki ena là-dans et ou bizin faire zeffort pour éloigne sa bane manquements ki ena là-dans là. Et pour faire sa li nécessite ene goût et l'intérêt, et sans ene grand goût et l'intérêt là, bé ni ou pou capave ena l'amour pour Allah, et pour Allah So Rassool. Si ou goût même bas, faible, bé ou l'amour

pou dimoune ki ou content là aussi pour bas même. Sa c'est ene zaffaire naturel et beaucoup de fois en négligent sa zaffaire là ou pas capave cherche bane solution pour ou bane problèmes intérieur. Ou penser ki ou pé faire beaucoup zefforts pour gagne l'amour Allah ou faire *duahs* aussi mais là aussi ou péna aucaine goût, ou pas pé gagne aucaine plaisir dans *Salaat/ Namaz* et ni dans bane bon actions. Ou penser ki ou pé faire *duah* et ou *duah* pas pé accepter.

Ene raison possible pour sa c'est ki ou goût fine capave gâter, et à cause de sa tous les temps ou pé pense bane tel plaisir mondaines ki ou trouver correcte. Ou attirer vers sa ; ou l'amour mondaine fine surpasse l'amour ki ou ti bizin ena pour Allah et sa pas fine crée sa goût là pour gagne l'amour d'Allah ou sois pour faire le *Néki* (bon action). Kan sa goût là même pas correcte bé l'amour là aussi pas pou correcte. Li pou reste ene zaffaire imaginaire seulement. Li reste ene revendication seulement. L'amour pour Allah là pas sorti du profondeur du cœur, lerlà même ou bane *duahs* aussi pas sorti du profondeur du cœur et ou *Salaat* aussi pas pou ene *Salaat* ki éna goût, et dans quelques seconde ou ene minute ou fini faire *Namaz* là couma dire sa ti ene fardeau pour ou.

Donc, pou ou réussi ena sa goût de *Namaz* là, et pour ki ou bane *duahs* accepter, ou bizin ena ene grand reforme spirituel pour apporter. Faudé premièrement ou ena ene l'amour profond pour Allah ki faire ou passe par bane épreuves pli dur, pour tester ou l'amour pou Li, mais ou, ou pas décourager. Au contraire, ou augmente ou l'amour plisse encore, ou pas désespérer. Ou pas laisse ou bane épreuves faire ou éloigner plisse avec Allah ou sois ou quitte *Namaz* et *Duah, Zikr, Telawat Quran*, et bane les zot bons actions pour gagne l'amour Allah en profondeur. Ena beaucoup zeffort et sacrifice bizin faire pour ki ou gagne l'amour d'Allah, pour ki Allah content ou. Lerlà ou pou trouve acceptation de ou bane *duahs, Namaz* et ou bane bon *Néki*.

Coumsa même, pareil couma mo ti dire, le « *Ghibbat* », li pas ene zaffaire si simple couma bane dimoune croire. Tanque ki ou goût et l'intérêt pas correcte et tanque ki ou pas gagne sa vue avec laquelle Allah guette So bane *banda* là, bé aussi longtemps ki ou péna tous sa, bé ou pas pou conner même ki kan ou faire le « *Ghibbat* », bé ou pé mange la chaire de cadavre de ou frères, et alor Allah Li-même pou éloigner avec ou et condamne ou pour sa. Et le fait ki kan ou fer sa [le « *Ghibbat* »] et ou pas gagne ene dégoût pour sa, sa indiquer ki ou goût fine gâter nette.

Donc, ena ene signe bien-bien claire ki Allah fine mette devant nous. Lor sa mesure là nous capave avec certitude constate l'état de nous lé cœur. Donc, kot nous pas pé réussi redresse nous, à la lumière de bane résultats ki nous pé gagner, alor nous bizin concerner lors sa bane mesures ki mo fine mette devant ou. Sa bane mesures là péna aucaine mensonges là dans.

De ce fait, nek ou bizin redresse ou goût et l'intérêt, lèrlà ou pou gagne l'amour pou Allah, l'amour pour le Saint Prophète (saws) et l'amour pour bane Choisi d'Allah ki vini de la part d'Allah pour amène zot lor le droit chemin. Dresse ou goût, à ce moment là ou pour ena de l'amour pou bane bons actions et ou pou ena ene dégoût et la haine pou bane péchés.

Si ou pas redresse ou goût, bé ou pas pou capave faire sa zaffaire là. Donc, en référence avec le « *Ghibbat* », le prochain pas ki mo attane de ou c'est ki ou bizin examine ou le cœur, combien plaisir ou pé prend avec le « *Ghibbat* ». Si ou pas capave élimine li ene sel coup, ou bizin guetter si pas ou pé diminuer ou goût pou le « *Ghibbat* » ou non. Si ou pé diminuer sa goût et l'intérêt [pou « *Ghibbat* »] là bé *Alhamdulillah* ou capave sapper, ou en bonne santé.

Mais si après ou fine tane bane conseils bien ferme et ou décider pou pas faire le « *Ghibbat* » mais là aussi ou continuer faire li et ou prend même plaisir à faire li, bé li veut dire ki ou pas pé apporte aucaine reforme. Ou fine faire des efforts à coupe connexion par la force. Et kan ena bane tendance naturel, bé avec la force pas capave arrêter mais ensuite zot pou ré-ouvert et recommence encore pli grand.

Alors donne l'importance à comment pou éradique (retire) « *Ghibbat* » complètement de ou la vie et examine ou-même en profondeur pareil couma mo fine essaye montrer ou. Et ou bizin ena sa certitude là ki en tant ki ene Jamaat si nous libérer complètement de « *Ghibbat* », bé nous communauté aussi pour sauve. Nous relation sociale aussi pour sauve. Bane manquements ki ena dans nous l'intérieur même, si tous pas aller, mais au moins pour ena ene grand diminution, et lèrlà bane mauvais résultats ki nous trouver tous les jours dans domaine mariages, lor là aussi sa pou ena ene l'effet positif extraordinaire.

Ou capave mazine ene coup situation de bane la cazes - mo pas capave alle personnellement dans tous la caze mais saki mo fine trouver, et témoigner, surtout pendant mo bane *Dawa*, et saki Allah aussi montrer moi, mo fine conner ki tel tel kalité dimounes, couma capave pé causer dans zot la caze. Ena places bane ti filles et zot maman assizer ensemble cause contre zot *Bhabhi*. Et là-dans frère là aussi pas ena sens de l'honneur et li pas conne accompli droit so madame ; zot mette li aussi ensemble et zot cause contre belle-sœur là. Zot dire sa imbécile là fine faire tel-tel zaffaires, et tous sa là créer désordre dans ene ménage entre monsieur et madame.

Tous sa là c'est bane dominaire, désordres et injustice et li ene « *Ghibbat* » aussi et ena beaucoup sortes d'injustice dangereux encore là-dans. Si pauvre belle-fille là fine arriver aussi faire ene erreur et si ou ena vrai sympathie are li – bane sympathie ki ou ti bizin ena suite à ou connexion are Hazrat Muhammad (saws) – bé à ce moment là ou ti bizin vine ene la glace pour li. Ou ti pou faire li comprend avec beaucoup l'amour, et même ou ti pou senti so difficulté et emplace pou ena la flamme de la haine, « *Ghibbat* », la guerre, la caze vine ene l'enfer, nek palabre, dispute, battu, ou ti pou transforme tous sa là en paix kot la paix ti pou établie dans la caze, accorité et la caze ti pou bon pou vivre kot ena la paix, tranquillité, accorité, péna la guerre, ni dispute. Par ou action noble, ou ti pou faire monsieur et madame vivre en l'harmonie avec la paix et tranquillité et *Barakat* d'Allah aussi pou ena dans ene ménage.

Parfois ou trouve bane belle-fille aussi ki contre zot belle-mère et zot belle-sœur. Zot cause toutes sortes kalités kitchoses avec zot mari contre zot belle-mère et belle-sœur. Zot conner ki mari là pas là, li alle travail, et alor, kan à zot, zot dans la caze ene journée, nannié à faire ; mari sorti travail et le soir, remplie so zoreille avec tous sortes kalité causer contre mari là so maman et so bane sœurs. Et zot bien envie ki mari là séparer de tout so bane familles et retire li ene coté nette. Femme là so le cœur tranquille kan li fine trouve so mari coupe tous relations avec so maman et so bane sœurs, pourvi ki li continuer garde relation are so maman et are so propre famille ; c'est-à-dire maman et famille madame là. Donc, crée désordre pour quelqu'un et crée l'amour, la paix pas capave reste ensemble.

Alor, si ou guette ki passer dans la vie familiale ou conjugale, si le commencement du voyage même li bazé lor la haine et bazé lor bane zaffaires détestable, lor bane zaffaires humiliant, alor ou fine commette ene grand péché bien détestable

devant lizié d'Allah. Si vraiment ou dire ou ena *Mohabbat* pour Hazrat Muhammad (saws), bé faudré ki sa parole là résonner dans ou zoreille ki ene musulman li ene miroir pou ene lotte musulman. Avant aussi mo fine déjà dire ki miroir pas faire aucaine tapage. Si ene dimoune fine mal habiller, pas bien dresse so cheveux etc., si n'importe kan ene dimoune li guette li dans la glace, bé très tranquillement la glace là indique li so bane défauts. Donc, ena beaucoup sagesses là-dans. Ene musulman corrige et amène reforme d'ene dimoune très tranquillement pareil couma sa la glace là, et encourage sa dimoune là pou réalise so erreur et pour corrige li correctement.

Donc, faute de temps mo bizin arête là même, ene sujet tellement important et bien vaste dans tous so aspect. C'est ene sujet ki pas capave arrête ici, et bizin continuer. Ki Allah (swt) donne moi sa *Tawfiq* là pou continuer lor le même sujet, pour *Tarbiyyat* de tous bane musulmans à travers le monde et à toute l'humanité en générale. Mo faire *duah* ki à travers sa bane Khutba Jummah lor sa sujet là ki le problème familiale, conjugale dans la société etc. résoudre, ki ena la paix établie partout dans le monde et dans sak la caze. *Insha-Allah, Ameen.*